



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 10



Onok linük ajak den sendaktepa
lenir: Taliban lenir Ghani Baradar

IPL 2021: Punjab Kings nung
Nathan Ellis denogo



VOL. XVIII NO. 309 (ADOK 309) DIMAPUR

AMUNGNÜ (SUNDAY)

LUROI (AUGUST) 22, 2021

₹ 5.00

COVID-19 Nagaland: 72 dak putet & 108 taneptsü angu

Kohima, August 21, 2021 (TYO): Honibarnü Nagaland nung COVID-19 puteta alir nisung 108 taneptsü angu aser 72 dak putet.

"Tesüiba ghonda 24 tsüingda COVID-19 puteta alir nisung 108 taneptsü angu. Parnokji Kohima nung 36, Dimapur nung 33, Mokochung nung 15, Tuensang nung 9, Longleng nung 7, Wokha nung 5 aser Peren nung 3 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Nagaland nung COVID-19 nung nisung 27,099 taneptsü nguogo aser ibaji 91.69% lir.

"Tanü nisung 72 dak COVID-19 aliba putet. Parnokji Kohima nung 34, Dimapur nung 25, Mokochung nung 6, Phek nung 3, Peren nung 2 aser Tuensang o Wokha nung kaka (1) lir. Tang nisung 994 anepaludar" ta Dr Kikon-isa ashi.

"Tang tashi nung COVID-19

alitsü akok ta temolung melemi bilemba sample 299,998 tendangogo. RT-PCR ajanga 105,593, TrueNat ajanga 72,800 aser Rapid Antigen Test ajanga 121,605 tendang" Dr Kikon-isa metetdaksü.

"Hokolbar tashi nung nisung 645,716 nem COVID-19 vaccine indang dose 827,249 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,846, healthcare workers 15,989, arishi kum 45 ser temapur 190,670 aser arishi kum 18 nungi 44 tsüingda alir 378,211 lir" ta paisa ashi.

"Vaccine agirtem rongnungi nisung 179,872-i dose anaprong agiogo. Parnokji frontline workers 42,857, healthcare workers 12,831, arishi kum 45 ser temapur 110,622 aser arishi kum 18 nungi 44 tsüingda alir 13,562 lir" ta Dr Thurr-isa metetdaksü.

Guwahati nung doctor kati tanurtem angati yaritsü

Guwahati, August 21, 2021 (Agencies): Guwahati nung nisung ajaki meteta aliba pediatrician Dr. Gokul Bora-i Covid-19 ajanga tsürabur asüba tanurtem angati yaritsü osang metetdaksüogo.

Dr. Gokul Bora-i tanur doctor ka ama inyaka arur kum 50 ajungba tenung nung iba teyari agütsütsü. Dr Bora-i medical wadang nung mapa tajung aika inyaksüogo aser paisa academic articles aser research papers aika züluogo.

"Ni kum 50 tashi medical wadang nung mapa inyaka aruba atema pelar aser tang ya ni loktiliba nem meyipa agütsütsü mapang ka lir. Covid ajanga tsürabur asüba tanurtem ni angati anepalutsü"

Pai Hombar nungi Honibar tashi Bora Children's Clinic, R.G. Baruah Road, Guwahati nung tanurtem anepalur.

Dr Bora-i teti nungdakbapurtem yarir aser akokba tashi sensakertem angati yariba den mozü angati agütsü.

Covid-19 vaccine indang booster shot atema data peria mali: AIIMS director

New Delhi, August 21, 2021 (Agencies): Israel aser United States dena linük kar nung coronavirus vaccine indang booster shot agütsütsü melaogo saka India nungbo iba mapa inyaksü atema osang tejangja mali ta All India Institute of Medical Sciences (AIIMS) director Dr Randeep Guleria-i ashi.

Covid-19 nungi kumzuka alitsü atema India nung booster agütsütsü atema osang tejangja bendena mali. Sangkum kum tetenzüklemn tashi nung ang iba osang angutsü akok, ta Dr Guleria-i ashi.

"Taintem aser COVID-19 menatsü akok ta bilemba

nisungtem nem booster shot agütsütsü atema data peria mali. Vaccine temi temang kumzuka ayuba metettsü atema asenok ket nung osang karbo alitsü nungdaker. Osangtem bendendar aser kokra sangkum kum tetenzüklemn tashi nung booster shots koba agitsü aser shirnok nem agütsütsü'ar metettsü akok" ta paisa metetdaksü.

Dose ka dang agütsüba vaccine tem atema tanabuba dose ji booster shot lir. Ano, dose ana agütsüba vaccine tem atema tasembubaji booster shot asütsü.

Tang tashi nung India ajungalen COVID-19 vaccination drive kübok COVID-19 vaccine dose crore 58 tema agütsüogo.

MGNREGA schemes nung Rs 935 crore tim mesüi amshi: Congress

New Delhi, August 21, 2021 (Agencies): Taoba kum 4 tsüingda MGNREGA schemes indang Rs 935 crore tim mesüi amshiogo aser iba tebilemstü khuret ya sorkari abentsü kechiyong parnoki ochimashiba mazüoktet, ta Congress-i Honibarnü metetdaksü.

Congress-isa sorkar dang police forces nung matamabensar nem 4% quota tanaben lezmüksütsü atema takhangba agütsüogo.

"Tesüiba kum 4 tsüingda Mahatma Gandhi Employment Guarantee Act (MGNREGA) kübok scheme balala nung Rs 935 crore tim mesüi amshi ta Rural Development Ministry indang osang ka ajanga ashir" ta Congress spokesperson Pawan Khera-i metetdaksü.

Ministry of Rural Development kübok social audit units balala ajanga iba sen ya bushitet, ta paisa ashi.

"Social audit unit ajanga mapa aika nung sen tim mesüi amshiba bushitet. Kum pezü tsüingda Rs

935 crore tim mesüi amshiba nungi Rs 12.5 crore (1.34%) dang ngutetogo" ta Khera-isa metetdaksü.

Narendra Modi sorkari mapa shitak meinyakba aser temolung magütsüba ajanga senotsü tim mesüi amshir, ta paisa tai tongloksü.

"MNREGA scheme nung sen tim mesüi amshiba indang tebilemstü khuret ya India sorkari abentsüla aser MGNREGA inyakyim nung lateta aliba ama social audit inyaksüla" ta Congress party-isa takhangba agütsüogo.

India sorkari tekaratiba nung sen tim mesüi amshiba ajak meyipa angutsü atema inyaksüla aser sen jagi COVID-19 ajanga kanga timtemba sensakertem yaritsüla ta Congress-isa takhangba agütsü.

Sen timtiba tim mesüi amshibaji Tamil Nadu nung liasü. Tamil Nadu nung 2017-18 aser 2020-21 nung Rs 245 crore tim mesüi amshi. Bihar nunga Rs 12.34 crore tim mesüi amshiogo

ta Congress spokesperson Khera-isa ashi.

Jharkhand nunga BJP sorkar yimsüsüba mapang Rs 51.29 crore tim mesüi amshi saka Rajasthan nungbo MGNREGA funds tim mesüi amshiba mali, ta paisa metetdaksü.

Iba ajanga BJP indang tebilemba jungkai adoka sayur, kechiyong par sorkar nem Rs 935 crores tashi tim mesüi amshidaksü aser ibaji tax agütsürtemi sensaker nem agütsüba sen liasü, ta Khera-isa ashi.

Centre sorkari police forces nung matamabensar nem mapa 4% yutsüba agien anungji parnok asoshi tanaben lezmüksütsüla, ta paisa takhangba agütsü.

"Iba sorkar kübok tetsür anema mapa inyakba teimba kumogo saka tetsür police ketdangsür asoshi 'reserved posts' 90% tema tazung lir anungji item nung nisungtem shimoktsü akhanger" ta Khera-isa metetdaksü.

Northeast nung digital media 9 longjemer NADCOM tentetogo



Guwahati, August 21, 2021 (Agencies): Northeast nung digital media telok 9 longjemer Northeast Association for Digital Communication and Media (NADCOM) tentetogo.

Iba telok ya Ministry of Corporate Affairs nung register süogo aser not-for-profit Section 8 company ka lir. NADCOM ajanga tajungtiba nung journalism mapa inyaksü tenangzükba lir.

NADCOM indang founding members: Guwahati nung amenoka aliba East

Mojo, G Plus, InsideNE, Northeast Now, Time8 aser The News Mill; Shillong nung amenoka aliba The Northeast Today (TNT), Garo Hills nung amenoka aliba Hub News aser Gangtok nung amenoka aliba The Sikkim Chronicle.

Parnoki tawa tu lokti senden ka menogo aser idangji 2021-22 kumsük atema Chairperson, NADCOM inyaksü Sujata Gurung Chowdhury (Northeast Now) shim.

Tanga ketdangpurtemji Afrida Hussain (InsideNE)

Director aser Jayanta Deka (The News Mill) General Secretary lir.

Ministry of Electronics and Information Technology-i lateta aliba inyakyim ama NADCOM-i Internal Ethics Committee for Self-Regulation tentetogo.

Iba internal committee nung züngsemtemji Justice B K Sharma, Judge (retd.), Gauhati High Court; John S Shilshi, Retd IPS officer (Manipur Cadre) aser Advocate Jorgay Namka, President, Bar Association, High Court of Sikkim nung lir.

NADCOM-isa parnok indang website - nadcom.in sayaogo aser iba nung parnok indang alizüing aser teinyaktsü osang shia lir.

Iba website ajanga Northeast region nung inyakba digital media teloktemi membership application agütsütsü akok.

Assam CM-i 2023 tashi nung land records ajak digitize asütsü metetdaksü

Guwahati, August 21, 2021 (Agencies): Assam chief minister Himanta Biswa Sarma-i Revenue & Disaster Management Department dang 2023 kum tashi nung land records ajak digitize asütsü atema tetuyuba agütsüogo.

Paisa Department dang sangkum May ita state sorkar

kum ka mabensadang 'partition' aser 'mutation' ken o ajak tembangtsü ayongzük.

"Iba mapa atema takum October 2 nü Mission Basundhara tenzüksü. Sangkum May 10 nü state sorkar kum 1 abensatsü anungji ken o ajak iba tashi nung tembanger alitsüla" ta

CM Sarma-i ashi.

Revenue & Disaster Management Department-i Assam nung district 27 nung non-cadastral villages aser ali detailed survey asütsüla. Ajisüaka, iba mapa nung Sixth Schedule areas madentsü, ta paisa metetdaksü.

Modernize yimya nung yangluba Mkg ADC Planning Conference Hall lapokogo



PWD Minister & DPDB Chairman, Tongpang Ozüküm densema NLA Speaker Sharingain Longkumer-i Mokokchung ADC Planning Conference Hall lapoktsüdang tangokba noksa nung angur. Mokokchung, 21st August, 2021.

Mokokchung, 21 Aug (TYO): Nagaland P.W.D (Mechanical & Housing) Minister aser Mokokchung DPDB Chairman, Tongpang Ozüküm densema Aug 21 nü Nagaland Legislative Assembly (NLA) Speaker aser taoba DPDB chairman, Sharingain Longkumer-i tawa tanü amshiba osettsüset inoka yangluba Mokokchung ADC Planning Conference Hall lapoktsüogo.

Pai iba conference hall tasenba lapokja jembidang, iba senden kilem yangerba maparen nung Mokokchung district kübok elected member-temi anir ano shirnokisa lenmang balala ajanga yaritepogo, parnok ajak dang pelaba metetdaksü.

Yaküm küm nungi Covid-19

wara ajanga lenmang aisü nung tsükdakrang ajuruba ngua sorkar ketdangsürtem tangaleni moi pei district nungi dang video conference ajanga senden aser training balala adentsü nungdakba reprangteta iba modernize/digitize conference hall yanglutsü shisateta liasü aser tanü aji asangsang ataloker, ta Speaker-i pa Mokokchung DPDB Chairman asüdang achayangba mapa kar lemsatop.

Tanü putu 'digital empowerment' ya kanga tongtibang aser mepaitoktetba maparen ka kümogo, anungji, mezüngbuba district level nung iba maparen ya tenzüka aotsü aser meilongi yimyak yimtsüing tashi nung tongjema aotsü nükla lir, ta paisa nukjidong kar lemsatop.

Tuensang DTF aser state level monitoring team na senden amen

Dimapur, Luroi/August 21 (TYO): COVID-19 atema Tuensang District Task Force aser Tuensang atema Secretary, DUDA, Anden Konyak aser Joint Director Directorate Health & Family Welfare, Dr. Ahu Sekhose nati anir state level monitoring team na August 21 nü DC Conference Hall, Tuensang nung senden ka menogo. Iba senden ya Deputy Commissioner aser Chairman Tuensang DTF, Kumar Ramnikant, IAS lenisüba nung mena liasü.

Senden nung ojembiba mapang state monitoring team lenir, Anden Konyak-i, parnok team ya DTF den longjemer inyaksü aser district nung timtem tekangshitem angatetsü asoshi lir, ajita asünungdang parnoki state COVID War Room nem osang agütsütetsü, ta ashi. Paisa, parnok team ya District Task Force aser State War Room na tsüngda tesendaktep lir aser arok nukjidongji nüburtem nem osang tejangja agüja wara nungi nisung taküm kümzüksü asoshi lir, ta ashi.

COVID den raraba mapang NGO aser lokti tentet balalai teyari agütsüba atema tenüngsang agütsüba den pai lokti balala aser lenirtem dang district nungi tashidak meshimeshia samatsütsü asoshi takokba tashi wara

azüoktsü atema meranga inyaksü ayongzüik.

Konyak-i, wara tasembuba wave agi kongshira tanurtem dak kongshitsü, kechiyong parnok vaccine magi lir, anungji wara prokshia meyoktsü atema ajak kümküma alitsüla, ta ashi. Paisa, COVID anema anibelem mesasai tanenmakai inyaktertem dang kanga pelaba lemsatop.

Kasa mapang nung Dr. Ahu Sekhose-i, district nung COVID wara takok ngua azüoktetba atema tenüngsang agütsü. Pai, tashidak tendangba aser vaccine agütsüba sentong nung DTF aser Medical department den longjemer NGO aser lokti-i shilem tajung agiba ya tatishitsü tajung aser iba ajanga aika ajungmesor, ta ashi.

Senden nungsa COVID Tuensang, Nodal Officer Dr. John-i, Tuensang District nung covid jenjang metetdaksü. ES CBLT, Rev Achu Chang-i, yimyak yimtsüingtem nung vaccine kanga takok ngua agütsüyonga aoba indang lemsatop aser pai district DTF, ECS, HOD temi teyari tulu agütsüba atema kanga pelaba lemsatopa liasü. Paisa, August 23 nü nungi vaccine agütsüba sentong tanabuba tenzüksü aliba indang metetdaksü.

Maneni District Hospital Tuensang-i, COVID hospital

Nüburtem nem osangtsüsang tapu balala anganüa agütsütsü aser sorkar sentong tapu balala otia nübur nem metetdaksütsü asoshi Deputy Commissioner office nung "dashboard" ka tenzüksü wadang anüngdaka lir, aser ibaji ataloktsü asoshi merangtsü, ta paisa metetdaksü.

Minister Tongpang Ozükümia mapang tatsüka agia jembidang, iba mapatong ya NLA Speaker Sharingain Longkumer Mokokchung DPDB Chairman asüba mapang achayangba mapa ka lir, aser iba mapatong nung yariteper ajak dang pelaba den iba conference hall tajungtiba anepalua amshitsü asoshi tayongzüikba ka agütsü.

Iba conference hall ya modernize yimya nung yangluba ka lir, yangi 86 inch smart LED screen den sound system kanga junga amenoka lir. Tangaleni moaka yangi nungi online ajanga senden aser training balala dentetsü. Covid-19 SOP melira yangi nisung 70 tashi mentetsü.

Sentong nung Mokokchung DC aser DPDB Vice-Chairman, Limawabang Jamiria mapang tatsüka agia tarurtem agizükba den tepela o kar lemsatop. Iba sentong nung sorkar ketdangsürtem den mulungtet telok nungi lenirtem aser osangzülurtem densema liasü.

aser mozükidang nübu indang osang agütsüba den district kübok CHC ajak den District hospital tesendaktep yanglutsü nungdakba lemsatop.

Tuensang nung amenoker aliba NGO; Eleutheros Christian Society-i COVID den raraba mapa Tuensang nung tongtibang shilemagia arudar aser parnoki yimtsüing 108 nung vaccine tanabuba round agütsütsü atema nukjidong yur aliba metetdaksü. Iba dak sendakba nung Associate Director ECS, Chongshen Soted-i, yimtsüing nung nübu züngdang vaccine agütsütsü sentong lir ta ashi.

Senden nungsa SP Tuensang Amit Nigam-i wara pokteter state mokdanga aliba mapang parnok inyakyimtem metetdaksü. Paisa, medical dak ajemdaker vaccine magitetsü pur kar dak alaker DEF Tuensang Forces ajak vaccine agiogo, ta ashi.

Senden tembangba sülen DTF aser state level monitoring team-i Tuensang nung BSL-II Lab aser tawa District Hospital, Tuensang nung amenokba Oxygen plant semdang aser iba sülen parnoki PHC, Longphang semdang. Iba team yagi PHC Kuthor, CHC Shamator, PHC Longkhim aser PHC Chari semdangtsü.

NBSE-i ayongzüka webinar ka agiogo

Dimapur, Luroi/August 21 (TYO): School shibanger aliba mapang tesayurtem tasa arangtetsütsü aser parnok den sendaktepa alitsü nukjidong nung Nagaland Board of School Education-i Webinars balala ayongzüka agia arudar. Iba dak sendakba nung August 20 nü kaketshirtem den online ajanga tajungba sendaktepsü asoshi sensaksem sentong ka agiogo. Iba sentong nung shisalen agütsürji Dr. Sapna Agrawal liasü aser Madhubhan Publication den longjemer iba sentong agiogo.

Sentong nung district balala nungi NBSE kübok züngoksema aliba school tem nungi tesayur 800 shi-i shilem agiogo. Educationist aser YouTube nung I Big Wonder ngutetla Dr. Sapna Agrawal-i, tetsükdaksü balala ajangshiba aser item tetsükdaksütem bentetsü atema lenmangtem sayua liasü. Lai online ajanga kaketshirtem yimayimpong tajungba azüoktsü, Online ajanga sayutsü atema lesson plan yanglutsü tasatem

US nung züngnertem atema lenmang lapoktsür

Dimapur, August 21 (TYO) : India nung alirtem US nung undergraduate, graduate aser doctoral jenjang nung züngnertem atema Education US ajanga online nung tongtepretepsü asoshi August 27 aser September 3 anogo ana agia US University Virtual Fairs 2021 sentong ka agitsü ayongzüka lir.

Education US ya US higher Education atema lenmang sayudak ka lir aser parnok ajanga alima tesem balala nungi US nung züngnertem nem lenmang sayua züngdaksütsü meranger. India nung Education US center-temji Ahmedabad, Bangalore, Chennai, Hyderabad, Kolkata, Mumbai aser New Delhi nung lir aser itemji United States-India Educational Foundation (USIEF), Indo American Education Society, Ahmedabad; Yashna Trust, Bangalore aser Y-Axis Foundation, Hydrabad teloktemi anepalur.

Iba US University Virtual Fairs 2021 sentong nung adener US nung züngnertem aser parnok tsüraburtem dang US nung aliba kaketrejtem, yangji azüngtsüba yimya, funding aser

lemsatop. Laisa, class minute 30 agiba tsüngda tangazükertem nem shilem agidaksütsü asoshi inyakyim balalatem lemsatopa liasü.

Tesayutsüji dang masü saka pelaa aliba tangazükertem dang sayutsüjia kanga tongtibang. Pelaa aliba tangazükertem-i tajungba angazükettetsü aser yamaji tajangzüik timba angutsü. Iba ajanga tangzüikba nukjidong aser tangazükba kuli liromedemdaksür, ta lai ashi. Kasa mapang nung ken o asüngdangtepa telangzüba agütsüba sentonga ka agia liasü. Dr. Sapna Agrawal ya Kota nungi Educationist ka lir aser lai iba amala mesükba session tem mapangshia agütsür.

Maneni Board-i August 27 nü nikongtsütsü 4:00 ako nungi tenzüka "Stress Management" onük nung ajemdaker webinar ka agitsü, kong shisalen agütsürji Ira Sehgal asütsü. Sehgal ya, Behavioral Skills, Study Techniques, Stress & Time management aser meylongi angazükertem dang sayutsü tasa dak sendakba nung mongin lir.

scholarship ama nüngdaktem indang ashitsü aser ano US nung züngnertem asoshi US Bureau of Consular Affairs nungi visa dak aketba temetetsütema angazüktsü.

Iba sentong nung US nung azüngtsü janrar kaketshirtem aser tsüraburtem ajak shilem agitsü jaoker ta United States-India Educational Foundation nung Executive Director, Adam Grotsky-i metetdaksüogo.

Iba sentong nung adenertemi US nung lapoka aliba accredited College aser University noklang tema den nungdak aser temetnübatem a s ü n g d a n g t e p a sensaksemtemtsü. Iba sentong nung adentsü atema kecha fee mali, angati dang tentetsü.

Kaketshirtem rongnung Master's mesüra Ph.D aginürtem atema August 27, 2021 (Friday) aonung 5:30 nungi 10:30 ako (IST) tashi nung Registration link: <https://bit.ly/EdUSAFair21EmbWeb> nung shilemagitetsü aser ano US nung Bachelor's program aginürtem atema September 3, 2021 (Friday) aonung 5:30 ako nungi 10:30 akok (IST) tashi nung kasa link ajanga shilemagitetsü.

LIC Dimapur branch shibangtsüogo

Dimapur, Luroi/August 21 (TYO): Disaster Management Act, 2005 section 30 (1) (2) kübok tashi agüja aliba aser COVID-19 tashidak prokshia aoba nokdangtsü atema jenjang tapet agitsü asoshi Deputy Commissioner & Chairman DDMA, Dimapur, Rajesh Soundararajan, IAS-i, osang agütsüba anogo nungi L.I.C, Dimapur branch ghonda 48

atema shibangtsüba metetdaksüogo. Office shibanger aliba mapang merekmeju maparen balala benoka inyaksü.

Tenokdangba agütsür aliba sülen manidakertem Disaster Management Act, 2005 Section 51 nungi 60 aser IPC Section-188 dak ajemdaker tapet temerenshi agütsütsü, ta DC-isa metetdaksü.



Honibarnü Lokpriya Gopinath Bordoloi International Airport nung Assam Chief Minister Himanta Biswa Sarma-i Union Minister of Ports, Shipping & Waterways aser taoba Assam Chief Minister Sarbananda Sonowal pelaa agizükba noksa nung angur. Iba mapang BJP state unit President Bhabesh Kalita aser tanga lennirtem liasü. (Guwahati, August 21)

Assam nung sangküm New Education Policy tenzüksü

Guwahati, August 21, 2021

(Agencies): Assam sorkari April 1, 2022 nungi New Education Policy (NEP) tenzüksü t chief minister Himanta Biswa Sarma-i ashi.

Sangküm March ita tashi nung maparen tembangsü, ta Sarma-isa ashi.

"April 1, 2022 nungi New Education Policy (NEP) tenzüksü atema state sorkari mapa inyaker. NEP kübok high school ajak senior secondary school jenjang nung ajungketsü" ta chief minister

Sarma-i osangbener dang ashi. Sorkari küm ka tsüngda shisaliok rejutem nung academic infrastructure tajungba kümdaktsüsü, ta paisa shisem.

"State sorkar kümeteba sülen Assam nung lanur lakh 1 nem mapa agütsüsü nangzük. Iba tenangzükba inyaksü atema tanü state sorkari appointment process tenzükogo aser yakta education department nung mapa meyirjang aika indang advertisements agütsüsü aser TET agütsü" ta chief minister-

isa metetdaksü.

Sarma-isa Education department directorate balala nung candidate 767 nem appointment letters agütsü.

State sorkari kümhia iba policy nung inyakym tasentem bendenloksü aser taruba küm 5 tsüngda education department nung temelenshi bener arutsü, ta paisa metetdaksü.

"English oshi nung Science, Maths aser English sayutsü aser tanungba subject ajak tetsü oshi nung sayutsü" ta paisa shisem.

Assam police-i Taliban pusemer nisung 14 apu

Guwahati, August 21, 2021

(Agencies): Facebook nung Taliban pusemba olentem post asüba atema Assam police-i nisung 14 puogo.

Nisung 14-i social media nung Taliban dak sendakba olen lemsatepba atema apu, ta Assam Police Special DGP, GP Singh-i ashi.

Parnokji Darrang, Kamrup (R), Cachar, Barpeta, Dhubri, Hailakandi, South Salmara, Hojai, Goalpara aser Karimganj district tem nung apu.

Nisung 14 ji Maulana Fazul Karim, Abu Bakkar Siddique (Afga Khan Avilekh),

Saidul Hoque, Jawed Mazumder, Mozidul Islam, Faruk Hussain Khan, Saiyad Ahmed, Arman Hussain, Nadim Akhtar, Khandakar Nur Alom, Maulana Yaseen Khan, Maulana Basiruddin Laskar, Mujib Uddin aser Mortuza Hussain Khan nungertem lir.

Parnoki Facebook nung Taliban pusemba post asü aser Afghanistan nung tang tensa dak sendakba olentem lemsatep.

Taliban administration-i Afghanistan yimtiba Kabul atsünga agiba atema parnoki tenüngsang agütsü.

Covid19 agi asür 20% tashi tasü bener aru: NHM Meghalaya

Shillong, August 21, 2021

(Agencies): Meghalaya nung Covid19 agi shiranga asür nisung 20% tashi mozü kidangi tasü bener arur, ta National Health Mission (NHM) Meghalaya-i metetdaksü.

Mapang menur virus tendangba aser anepaluba ajanga nisung 20% tashi mozü ki matongdang taküm samar, ta NHM Meghalaya-i Honibarnü ashi.

NHM Meghalaya-i nübortem dang shirangba yinya lira tekaratiba nung Covid19

tendangtsü aser 14410 nung teyari meshitsü ayongzükogo.

Honibarnü Meghalaya nung Covid19 puteta alir nisung 8 asü aser nisung 231 dak putet.

Tanü puteterem züngsema Meghalaya nung nisung 73,448 dak Covid19 putetogo.

Honibarnü nisung 460 tashi taneptsü angu aser parnok züngsema taneptsü angur 69,043 lir.

Meghalaya nung COVID-19 ajanga nisung 1,269 süogo aser tang nisung 3,136 anepaludar.

ULFA (I)-i Assam nung totzü company tem amokmerener

Guwahati, August 21, 2021

(Agencies): ULFA (I)-i Assam nung ONGC, OIL aser IOCL dang lisopur nisungtem nem mapa agütsüsü takhangba agütsüogo.

Totzü company aseme iba mapa meinyakra merenshitsü ta ULFA (I)-i yashi metetdaksü.

ONGC, OIL aser IOCL-i contract mapa dang masü saka lisopur nisungtem nem

'permanent jobs' agütsüsü, ta ULFA (I)-i ashi.

"Parnoki iba mapa meinyakra aser Assamese nung anema inyaksangshiba manenra onoki prangpong amer parnok anema mapa inyaksü" ta ULFA (I) publicity wing züngsem Rumel Asom-i ashi.

ULFA (I)-i totzü company tem dang Assam nungi ali rongsen agitetba aser iba nungi

Assam-i tajangzük anguba osang tejangja metetdaksüsü takhangba agütsüogo.

Parnokisa OIL nung managing director inyaksü atema lisopur ka shimtsü takhangba agütsü.

Taküm May ita ULFA (I)-i ONGC, OIL aser IOCL nung lisopurtem atema 95% job reservation asütsü takhangba agüja liasü.

Meghalaya police-i IEDs 2000 aser gelatin sticks 4000 apu

Guwahati, August 21, 2021

(Agencies): Hokolbarnü Meghalaya police-i Ri-Bhoi district nung tapoktsü aika ngutetogo.

Osang tejangja ka angazükba sülen police-i Byrnihat police outpost nung Guwahati-i aoba gari ka soter reprang. Idangji IEDs 2,000 aser gelatin sticks 4,000 tema

bena aliba apu.

Police-i Umsning nung iba gari anendaktsüsü merang saka driver-i jena ao aser iba jagi police-i gari sülen anidakba Byrnihat nung apu.

Police-i gari indang driver puogo aser Nongpoh police station nung Explosive Substances Act kübok ken o ka benokogo.

Tripura Congress president Biswas-i mapa nungi anenogo

Agartala, August 21, 2021

(Agencies): All India Mahila Congress president aser ex-Silchar MP Sushmita Dev-i Trinamool Congress (TMC) nung adenba sülen Tripura Pradesh Congress Committee (TPCC) president Pijush Kanti Biswas-i menden toktsüogo.

"Ni TPCC President (acting) inyakdang kü den yaritepba Congress lennirtem aser ni pusemer ajak dang kanga pelar. Tanü ni President mapa nungi anener aser politics nungi anisüngzük. Sonia Gandhi dang kanga pelar" ta Biswas-i metetdaksü.

"Mapang tamajung ka nung inyakogo. Tarutsü atema tia tajung moatsür" ta Sushmita Dev-ia Biswas dang sangoktsü.

Taoba hopta All India Mahila Congress president inyaka alila Dev-i Congress toktsür Trinamool Congress nung aden.

Congress-i Northeast state tem nung tashi angutsü meranger saka Biswas anenba ajanga parnoki tetsükdaksü ka ajuruogo.

Biswas ya taoba Congress lennir Sushmita Dev den tesentaktep tajung aliba nisung ka lir aser pai TMC nung adentsü akok ta osang angazük.

Barak Valley nung Congress züngsem 34 tashi party indang primary membership nungi anenogo aser parnoki All India Trinamool Congress (AITC) tashi itdaksüsü atema tenangzükba agiogo.

GOVERNMENT OF NAGALAND
DEPARTMENT OF ELECTRICAL INSPECTORATE
 OFFICE OF THE CHIEF ELECTRICAL INSPECTOR
 NAGALAND: KOHIMA

NO. CEI/ESTT-46/2021-22/93 Dated Kohima the 21st Aug. 2021

ADVERTISEMENT

In pursuance of Govt. letter No. NO. PWR/ESTT-42/2011/97 dated, 4th Aug.2021, applications are hereby invited from bona fide indigenous inhabitants of Nagaland for the following posts under the Department of Electrical Inspectorate, Nagaland:

Sl. No.	Name of Post	No. of Posts	Pay Matrix
1	L.D.A. cum Computer Assistant (Directorate)	1 (One)	Level 5
2	L.D.A. cum Computer Assistant (District)	2 (Two)	Level 4

- Eligibility Criteria: Graduate in any discipline from a recognized University. Minimum educational qualification for Backward Tribes is relaxable to 10+2 (Passed). Further, all candidates will be required to have 6 (Six) months Diploma in Computer Operation.
- Age as on **21.08.2021**. - Minimum : 21 years
Maximum : 30 years
The upper age is relaxable by : * 5 (Five) years for ST candidates.
* Further 5 (Five) years for Govt. employees who have rendered not less than 3 (Three) years of continuous service.
- For candidates who are Government employees and still serving are required to submit "No Objection Certificate" duly signed by the Head of Department with name and Office seal along with date of appointment.
- Reservation of seats shall be as per the existing reservation policy of the Govt. of Nagaland.
- Mode of Selection:
 - Written Examination (General English, General Studies and Computer Application for **150 marks**).
 - Viva-voce (**For 50 marks**).
- Application Form can be collected from the Office of the Chief Electrical Inspector, Below A.G. Office, Kohima from **24th August 2021** during Office hours on payment of **Rs. 200/-**
- The last date for submission of application form is **13th September 2021**.
- Application Forms received after the closing date or received incomplete in any respect shall be rejected and no representation against such rejection shall be entertained.
- Venue, Date and Time of examination will be intimated in all the local dailies in due course of time. No separate call letters shall be issued to the candidates.**

(Er. V. KEZO)
 Chief Electrical Inspector,
 Department of Electrical Inspectorate,
 Nagaland: Kohima.



TIR YIMYIM YIMOBILEM (EDITORIAL)

DIMAPUR

AMUNGNÜ

LUROI (AUGUST) 22, 2021

Tzüpu tapok

Israel nungertemi taküm tzü poktetdak tajung toktsür, parnoksa tsüpu yanglur saka parnoki yangluba tsüpu nungjibo tzü atsünga meyettsü, kechiyong tzüpuji tapok lir ta Tsüngremi Yeremia ainker dang ashiba asenoki Yeremia 2:13 nung shia angur. Taküm tzü poktetdakji tanga masü Tsüngrem lir ta kasa tapu nungjisa shia angutsü. Aji oda, Tsüngremer oshi nung tzüji Tsüngrem den atishir. Yeremia ainker sülen Yisu alimai arur külenang Pai nübortem den jembibanga tzü ya Tsüngrem nungi anguba tashi aser temoatsü, aji tanüla temeshi, den atishia jembib. Ibayongji, Yohan 7:37 nung Yisui "nisung kar tzüraa lira, paji kü dangi arudakjang aser jemdakjang," ta ashiba asenoki angur. Atangji, alima nung mopong liaka tzü melira nisung taküm alitsü makok. Kasaji, Khristan taküm ka tanüla temeshi medeni alitsü makok. Yeremia ainker ya timtem aser nungsen tizüktetba ainker ka liasü. Iba jagi paibo Tsüngremi ashiba o nübortem rongnung tulu tila na nem shitak belenzüka ashitsübaji kecha marendak aser tsübua mebilem. Tsüngremi pa den jembidang teti oset ka den atishia jembib. Aji oda, Israel nungertemi parnok Egypt lima alar tia nungi aniteta ninang mochtsü aser mamatsü talubosa angudak Kanaan lima nung yimji yimjung nung lidaktsüba Tsüngrem amadoker, tangar tsüngrem külem tenzükbaji, teti tajemtzü tzü tajung poktetdak toktsür, peisasa tsüpu tapok ka mesemetba den atishia Yeremia nem Tsüngremi Israel nungertem nem jembidaktsü. Kodang asenoki iba o ji tanü Tsüngremi asenok den jembir ama bilema agidir, asenoka Tsüngremi asenok nem moatsüba temoatsü aser taochi mereprangtet aser tenük masüng, jangrattemba, takarba aser tuluba akümtsü merangdang, asenok taküm aser kibong tesünep aser tepela nung alir masü saka shi nung aser tanüla nung taliang mepelaba aser shisatebuluba tia nung aliba asenoki angur aser ajangshir. Asenok ama Khristan taküm kaji kodanga tsüpu tapok ama takong asütsü makok. Asen takümji tepela, tesünep aser tanüla khuret abenba nüktzü agi kodanga makongba tsüpu ama asütsüla. Atangji, asenok rongnung aiben aikati "kü denbo Tsüngremi mejembir, sarasademtsü onüka marur, sentepia mouner, sarasadema mesünü kümogo," ta jembiba asenoki angashitsü. Ibaji tsüpu tapok nungi tzü tateta ajemtsü merangraba purtem lir. Ajisüaka, kodang asenok nem Tsüngremi agütsüba taküm tzüji tzülok küma yimdaktsüdir, asenok ajemajema melitetsü, asenoki iba tzüji tangar nema jemdangdaktsünütsü. Khristan taküm ka dak kodang tanüla temeshi lidir, yamaji ajemajema melitetsü, memeteti pei bang nungi tanüla ken adoker alitsü, memeteti tenük nungi tepela aser khuret abenba nüktzü alur alitsü, sarasadem manennütsü aser temeim mapa inyaktsü jangratsü. Ibaji Khristan taküm nung Tsüngremi agütsüba tsüpok dak nungi taküm tzü molamoshia ayimba tamaittsü asütsü. Iba tanüla temeshi tashiji asenoki aiben tazünga degree nungi angutsü amai bilema bushir, shisatokden sentongtem aser kakat nungi angazütsü meranger, saka iba taküm tzü tsüpok dakjibo Tsüngrem nungi angutsü aser ibaji asen nem angati agütsür. Ibaji tangalen bushia senzütsü menügdaker. Tanü asenok tazüng temeteteremi kija taküm aser kibong nem tzüratema taküm tzü mejemdaktsütetbaji aser arogo aser mungdang tashi mait kümdaktsübaji, Tsüngremi Yeremia dang ashi ama, asenoki shitakba taküm tzü tsüpokdak toktsür asen kolok agi tanga tsüpu ka yanglua jemdaktsütsü merangba ajanga lir. Tanüla temeshi maden asen kolok agi yangluba tsüpuji teti takong asütsü. Tzüpu takongji kechi sütsü? Iba jagibo tarua shinga marutsü aser asena taküm melitetsü. Ashiko, asenok rongnunga aika tanüla tsüpuji kongadoker, peladi asüyonga mepelateti alitsüa akok. Iba jagi asensasa asen taküm, kibong aser mapa agi jangramedemi alitsüa akok. Aji oda, taküm tzü kongadokba agi aikati peisasa pei taküm agitsü bilemer, pei apuani toktsütsü bilemer, pei chirnurtem agi alaker, kecha agia jangramatemer aser mepelar. Ibaji asen taküm nung temoatsü kongadokba tamaittsü lir. Aji kanga lendong lir. Aji oda, tajung kümnüaka mekümteba takümtemji tanüla nung tzüratzüponga alirtem asütsü. Item dangji Yisui ashir, "shibaisa ni agütsüba tzü jemdir kodanga metzüratsü saka iba nisungba dak nung jagi tzüji taküm tzü pokteta tzülok küma ayimtsü," Yohan 4:14. Tetezü, kodang aseni Tsüngremi agütsüba taküm tzüji jemdir, idangjibo asen tzüra atemba dang masü saka tangartema aika tzüratema ajemtsüsa asen dak nungi tanüla temeshi tashi aser temoatsüji tzülok küma ayimtsü.

OLEMSABANG

Arogo-i aser Laishiri yamai clean election nung shilem agidaktsüner

Ms. Esther (Osang zülur)

Tanü alima tensa tia bilemdanga nübun yimjung nung melitetba ya asadanga shisa lemsatepba Yanglushidi Sensaksem Sabang (YSS) WhatsApp group ajanga ayongba shisatokden sensaksem koba Rongchii (April) 30th 2021 aonung mapang 7:00 pm nungi tenzüka Zoom ajanga kaogo aser iba sentong nung o jembirtem WB. I. MEYIONEN JAMIR, Recipient of Governor's Gold Medal (Meritorious Service) Inspector General of Police & Director (RTD) Nagaland Lokayukta aser DR. T. JAMEDI LONGKUMER, Gold Medalist, Master of Arts (Philosophy) Assistant Professor, Government College, Dimapur, Editor, E.W. Clark Ao-English Dictionary (2013). Achaayangertem: Rev. L. Lima Jamir, Dimapur & Rev. Aowabang Ozükum, Guwahati, Iiasü Iba sentong nung o jembirtemi jembiba sülen lokti sensaksem mapanga agia liasü aser item onük tongtibang kar yamai zülur:

Tanü arogoi Clean Election khuret bona lemsatepba mapang ka nung joko State Assembly election ana (2013 & 2018) mapang iba wadang kanga meranga arogo, laishir aser nübuntemi inyakogo aser nisung aikati Clean Election Campaign (CEC) ajanga election nung temelenshi bener aruba aser takok anguba indang jembir, saka Clean election activities aika conduct asü aser sensaksem/mensem jenti ayong saka tatem nungbo akhi tejen yimya nungdang nübuntemi vote agütsü. Shirnoki rongsen teimba indoka nübuntem vote alizük, shirnoki bangdak tashi teyari/support, sen aser kidong/yim/tsükong politics ajanga ngutet parnoki election nung takok angu. Seminar, workshop, interaction aser social media ajanga Naga nungger aikati clean election indang angashia metetogo südi saka metetbaji implement mesütet aser mapa küma meinyaktet. Theoretical knowledge metetba kisüngjibo amajok, implement mesütetba aser mamshitetba tashitemet jibo tajangzük mali.

Tanü asen tendak: vote sen agi ayoker, mapa agütsütsü nangzükteper, temesepba yi jemteper, camp lapoker chiyongtepa kazüteper, senso candidate shimer, yimsüsür alizüker, senso candidate support masüba atema yimtsüngi maitdaktsür, yimtak nungi aridoker, senso nungi jentoker, vote magütsüdaktsür, voters slip malemer/rakzüka ayur, proxy vote agütsür, nisung teshimtet kari dang vote agütsür, booth capturing mapa inyaker, tashiyim mapa inyakteper, nisung tepseter. Tetemsü ochishir candidate doktsür candidate shibai sen teimba agütsür iba candidatejidang shimer. Ano ibala mesükba tamajung mapa jenti inyaker. Item ya India temzüngi memelaba dang masü, temenen mapa aser Lai tesayuba anema ta angatetdi.

Clean Election dak sendakba nung NBCC, ABAM aser Langpangkong Kaketshir Mungdangi mapa jenti inyaka arudagi aser Aor yimtsüng aika nung tetsürtemi kanga meranga yi meitba/apuba mapa küm aika inyaka arudar. Ajisaka tamajungba dang akümer. Lai tejangja mesayuba agi asü? Aroka shisadangtsü mapang ka.

Item memerükba mapa tamajung anema Arogoi aser talisa Laishiri timshilem magi odang ajia toktsütsü masü saka Tsüngrem tsüngdang temenen tongpang nung noktaker ama shilem agitsü aji kanga tongtibang. Election dak sendakba mapa tamajung tamangertemi maneni inyakba jagi arogo tamakok sayur. Asen lokti nung temenen tongpang tulutibaji iba ya ka asütsü, kodang tamanger ka ama asenoki ochi jembitsü? Arogo aser Laishiri anir mapusora ano shiba dak yimlatsü? South African political liberation nung Theologian Bishop Desmond Tutu ama, shibai Nobel Peace Prize angu, ano America nungger Baptist Pastor Martin Luther King Jr. ama alima aser nübun temeden asoshi noktakba (Civil Rights Movement), teyanglushir ka ama asenok rongnung arogo nung tenzükertem talisa toklang tenzüker aser Laishirtemi shilem tajung agitettsübaji kanga dang tongtibang lir.

Otsüla-obula nungger par putu yimli yimsüsüba menden asoshi nübun shimtetba yimya nung kanga dang asüngteta inyaka aru. Rongsen agi yimsüsüba menden alizükba sobaliba khenyongi mali asü. Sen yong parnoki par principle yoka achiba mangashi. Anungji asen tsüraburtem ochishiba tanela senmang amangtsü tanü nungdaker

Akhi arogo sentsüwangshia meren-merena nübun ajaki akhümtsübua, asüngteta, tashi angaa alibato samaogo, nübuntem arogoi soita aliba (arogo grip) to melie kümogo. Tsüngrem tenzükeri anir Arogo menden nung alirtemi alima yimsüsür (politician) yim asüba agi asü? tenla tenji aginüadang par küboki yiadok asü? Nisung shia pei nungdak ataloknüadang arogo dang nungi yimsüsürji tuluba kümdaktsü asü? Arogoji Ochi represent asüba telok lir. Asenok lokti nung teyimlatsü ajak agi Arogoji süra, Arogo nungi tenzüka nübun aser talisa tamangertemi tamang katettsüsa Ochiba dangi khen meyipdi. Iba ya Arogo aser Laishirtemi ret-reta agitsüla. Naga nungger tamanger jenjang jagi Arogo aser Laishirtem noksa sayur ta angatettsüla.

Tanü asen Aor yimtsüngtem nung Census figure aser Electoral Rollji yimtak malir teimba lir, RD household aser Administration nem House Tax agütsüba kilen balala, Job Card holdersji shitakba yimtak telidak pur dang nungi kanga agi teimba lir. Yimtak inflated figure paikaji koba agitsü? Item inyakyim ajak election dak sendaka lir. Alima temoatsü aginüadang koda Tsüngrem tsüngdang aibelener? Alima temoatsü dang nungi Tsüngrem temoatsüji tuluba ta tamanger shia nem angatetdaktsütsüji Arogo aser Laishir teinyaktsütem lir.

(Maneni asüng adok nung angutsü...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

EFI-i India nung Khristantem reshikangshiba jenjang asadang



Taküm January ita nungi June ita tashi nung India nung Khristantem anema inyakba noksa kar yangi angur.

August 21, 2021: Taoba ita India nung Khristan lenir 100 shi online ajanga senden ka mena linük nung Khristantem reshikangshiba onük nung o lemtepogo.

Iba senden ya Evangelical Fellowship of India (EFI)-i ayongzük aser senden nungsa tawa Pew Research Center-i sayaba report "Religion in India: Tolerance and Segregation" nung ajemdaker o lemtepa liasü.

EFI-i India nung Arogo 65,000 aser Khristan organization balala nungi lenir tenet panel shim aser parnoki Pew Research Centre indang report inyakyim ashishia iba senden nung adenerkem dang tasüngdangba balala asüdanga telangzüba meshi.

Pew Research-i India nung tamangba yimsü trok aser oshi 17 nungi India nung 30,000 shi survey agia iba report renem, aser iba survey nung shilem agir Khristan 1,000 shi liasü. Ajisüaka EFI panel-ibo, India nung nütsüng billiom 1.38 lir, anungji region balala nungi iba dang nungjagi nisung timba nem survey nung shilem agidaksü tajungba süla, ta ashi.

Pew survey ajanga ashiba agi, India nung tain 10 shi nungi 9-ibo linük nung pei yimsü sadoka amangteter ta ashi aser nisung 10 shia nungi 8-i, pei tamangba yimsü atema tanga yimsü-a akhümtsübutüsüji tongtibang ta ashi.

Kasa survey ajangasa, India nung Hindu nung shilem 3-i Khristan kibong den kidanger süa meliner aser Hindu nung shilem 25-i Muslim mesüra Sikh nung den kidanger süa meliner, ta bushitet.

Christian Post ajanga ashiba agi, India nung Hindu nationalism ainba ajanga persecution watchdog balalai tawa India dak tenük yoka arudar. Open Doors-i ashiba agi, alima nung Khristantem alitsü tamajungtiba linük 50 rongnung India ya jenjang 10 buba nung lir.

US Commission on International Religious Freedom (USCIRF)-ia US State Department indang Countries of Particular Concern (CPC) nung India züngoktsü anaben tashi benokogo.

Pew survey ajangasa, tesüiba ita 12 tsüngda India nung Khristan 10 shia nungi Khristan kati dang parnok anema inyakba ajangshio, ta bushitet.

Evangelical Fellowship of India (EFI)-i Pew report asadangba sülen anogo ishika tsüngda EFI indang Religious Liberty Commission (RLC)-ia India nung Khristantem sempaba aser taküm küm tenzüker küm tesadang (January -June) tashi nung Khristantem anema inyakba report ka sayaogo.

RLC-i, taküm January ita nungi June ita tashi nung India nung Khristantem anema inyakba tatalokba 145 liasü, aser item rongnung Khristantem dak azükba, tepsetba, Tenla ki amakba aser loktiliba nung Khristantem sendokba densema lir, ta metetdaksü.

RLC-i, taküm June ita tashi nung India nung Khristan asem tepset, Khristan 22 dak azük,

Tenla ki amakba mesüra raksatsüba tatalokba 22 aser yimtsüngtem nung Khristantem mindokba mesüra lokti nungi jendokba tatalokba 20 liasü, ta metetdaksü.

"Tamajungtibaji, Freedom of Religion Acts ozüing tesashiba akümba ya lir, koba dang anti-conversion laws ta ajar. Tamalen iba ozüing ya state 7 nung dang liasü saka tangbo BJP-i yimsüsüba state aika nunga benokogo. Taoba mapang nung iba ozüing nung ajemdaker Khristantem anema dang inyak, saka tangbo 'Love Jihad' nokdangtsü tenüing nung Muslim nung anema-a inyaker," ta RLC-i metetdaksü.

EFI commission-isa, India nung Khristantem anema inyakba tatalokba timbaji Madhya Pradesh aser Uttar Pradesh na nung liasü, iba sülen Chhattisgarh aser Karnataka states lir, ta ashi.

Afghanistan nung Taliban teloki Khristantem mita aoer

August 21, 2021: US sepaitemi Afghanistan toktsür aoba sülen Taliban teloki iba linük agiba nung ajemdaker linük nung aliba underground Arogo nung lenirtemi Khristantem dang kanga kümdanga alitsü metetdaksüogo.

Afghanistan nung underground Arogo ka nung pastor aser melungtet telok Global Catalytic Ministries tentetsangi melungtet telok ka nem Afghanistan tensa osang tejangja metetdaksüogo. Underground Arogo nung Pastor taküm lendongi maitsü atema pa tenüing mimshir.

Pastor-i sangdong ka ajanga melungtet telok dangji, "Taliban teloki meteta aliba Khristantem tepsettsü atema parnoki tenüing züludena lir aser parnoki Khristantem tepsettsü atema bushir. US Embassy shibangogo anungji Khristantem jenoktsü atema tesem mali," ta metetdaksü.

"Kidanger linüktemi arrotsü shibangogo aser nija tayimtsü senzüba dak alaka tayimtsü service ajak anenogo. Nisungtem jenoktsü atema

tenemleni ajener. Parnoki Tsüngrem dak dang imlar," ta pastor-isa metetdaksü.

"Taliban teloki ki shia mita oa tetsür aser tanurtem pudener. Tetsür arrshi küm 12 dak tema aliba kibongtemi pei kima 'X' ta zülua ayutsü, iba sülen Taliban teloki parnok puer aotsü. Parnoki kidangji X ta zülua mali ser tetsür tanur ka ngura parnoki kibong züngsem ajak tepseta indoktsü. Arrshi küm 25 dak tema tetsür ka kidangji ngura la kinüingbuji tepsettsü aser parnok inyaknüsü inyakba sülen alar ama yokadoktsü," ta sangdong nung shia lir.

"Kinüingbutem aser tebutemi pei kinüingtsü nem prangpong agütsür aser Taliban telok aruba mapang nung injang khalokjang ta tuyur. Parnoki Taliban pur khasettsü akok mesüra parnok sasa khasettsü; ibaji pei melung," ta sangdong nung shia lir.

Christian media ministry SAT-7 Tir, Rex Rogers-i, "Taliban teloki nisungtem dang phone meshia repranger, aser phone nungji Laishiba download süa aliba ngura

ANO GO ABEN TSÜNGREM DEN

Tebang-temeli sotang

"Shibaisa pei tebang aser temeli sotdir, timtem nungi pei taküm soter." S. Shin 21:23

Alima nung nisung shia sempet balala keter asor. Taküm ka asoshi sempet tamajung rongnung tebang aser temeli mazüokba yimya ya ka lir.

Kodang kiyonger mesüra külem tenzüker rongnung ibala yimya mazüoktetba nisung ka lidir teti nung aikati pa/la alidak O mashi mejembir.

Ken mapang ka nisung kati kar anenma pa tebang-temeli mazüoktetba "tayang küpzükbaji tanang" (Revenge is so sweet) ta ashiba ajanga lokti nung rongrong tulu adoka hopta ana shi school nung class maka iba O dakji soter atsütepa arur, tatemsa yimten yimsüsür ajanga metbüba dang student rongnung kar dak danga timtem atalokra pai abentsü ta tenangzüktetpba agia tembangba ajangshia liasü.

Nisungba jagi ibala ama O ji tebang-temeli nungi kazüka meyok asübo iba amaji timtem majurula, saka pa tebang nungi lijak jang tesashi mesükba O yokba ajanga rongrong tuluji adoktsüsa kümdaktsü.

Amangbaputem, asen tebang-temeli nungi adokba O temji ajaki agizüktettsüsa Tsüngrem O-i ashiba ama "pei tebang aser temeli sotdi", tajangzük makaba otem jembiba nungi kümdanga meita lidi, süra iba jagi asen taküm timtem jenti nungi kümzüka litettsü.

SARASADEM

Temeimba Tsüngrem, kü tebang aser temeli mazüokba ajanga tangar jashidaktsüba tai nangzüker. Nai taochi sayuangma. Amen

mesüra Laishiba Apps ngura idangyongjisa parnok khasetba osang tejangja angazükogo," ta metetdaksü.

"Phone nung Khristan dak sendakba langka danga lira Khristantemi lendong ajurutsü. Taliban teloki itdangiterem yua lir aser osangtsüsang proker jenti yua lir," ta Rex-i metetdaksü.

2021 küm June ita tashi nung SAT-7 PARS-i Afghanistan nung parnok sentong reprangertem kanga timba akümba osang metetdakja liasü. SAT-7 PARS-i Afghan nung dang Khristan yimsü dak sendakba sentong ana-"Window of Light" aser "Secret of Life" sayua aruogo.

Küm ana tejaklen Khristan yimsü agizüker kati phone ajanga SAT-7 dang, "Iba linük nung tensa kanga mejungi kümogo. Kü jala künaprong lendong nung lir. Ozü jala arrshi küm 8 dang aser kü dak alaka la repranger mali," ta metetdaksü.

Sayutsüngir Joel Richardson-i, "Yimtsüngtem nung Taliban teloki Khristan kibongtem metetra parnoki

tetsürji puer oa sempet ama Taliban sepaitem nem agütsür. Taliban yimsüsüba kübok Khristantem dang masü saka tanga yimsü amangertema lendong nung lir," ta metetdaksü.

"Taliban teloki tesüiba küm 20 tsüngda US nung den amalitepa inyaker Afghan nungera bushir. Afghan nung meyrjang aikati US sepaitem den oshi meyipzüksürtem ama inyakogo aser tang Taliban-i parnok den külemi America nung den amalitepa inyakertem ajak bushir," ta pai metetdaksü.

Taliban teloki Afghanistan agiba sülen Khristan agencies aser lenirtemi America nung dang masü saka alima tesem ajaklen Khristantem dang Afghanistan nung Khristantem atema sarasademjang, ta mepishia metetdaksüogo.

Global Catalytic Ministries-i Afghanistan nung Khristantem yaritsü atema emergency funds tenzüker aser parnoki Afghan nung kibong 1,500 yaritsü nükjidong nung US sen 500,000 bendentsü tebilemba yur inyakdar.

OLONG PAITEP # 5913

1				2				3		4
5		6								
							7			
8										
										9
		10				11				
				12				13		
14										
						15				
16										

- | | | | |
|------------------------------|-------|-------------------------|-------|
| TIPIEN | | LANGTSÜNGLEN | |
| 2. Auo nung chiyongsü asenba | - (7) | 1. Lenmang | - (7) |
| 5. Mangyimba mapang | - (5) | 2. Aor kidong ka tenüng | - (6) |
| 7. O tamendakdak | - (4) | 3. Tenarong maten | - (6) |
| 8. Pei dak malangba | - (7) | 4. A _ _ _ g | - (3) |
| 10. Juli | - (7) | 6. Mopung apodoka | - (3) |
| 12. Sen ayudak | - (7) | ola adokdaksüba | - (3) |
| 14. Tenük agi ajitet | - (4) | 9. Tongtipang tagitsü | - (7) |
| 15. Tamajung aküm | - (5) | 10. Menungra bilem | - (6) |
| 16. Apuso | - (7) | 11. Aiür | - (6) |
| | | 13. S _ _ _ k | - (3) |
| | | 14. T _ _ _ r | - (3) |

OLONG PAITEP # 5912 TELANGZÜBA

- | | |
|-----------------------------------|---|
| TIPIEN : | LANGTSÜNGLEN : |
| 1. Yiar, 3. Tesola, 7. Yimra, | 1. Yimti, 2. Amen, 4. Shiner, 5. Alaka, |
| 8. Tangar, 9. Peria, 10. Tanur, | 6. Satan, 9. Putet, 10. Tembar, |
| 11. Tasen, 13. Lemjem, 15. Tambu, | 11. Tatok, 12. Amang, 14. Jala. |
| 16. Khuret, 17. Sang. | |



TANÜBO NAI LANGZÜANG

Q. Indian Bank indang headquarters kong lir?
 A. Mumbai B. Chennai
 C. Bangalore D. Hyderabad

=====(Taruba adok nung onoki langzüsü)
YASHI ADOK TELANGZÜBA : Odisha

AO OSHI ANGAZÜKDAK:
TANÜ ANGAZÜKTSÜBA OJANG

Kopiga
 (adv) Lenmang, mapang aser tar tasazük kwi (how long ?)
 * Kidang nungi alu atongtsü kopiga shi aotsü ?

Kor
 (n) Khu abenba aser nisung amenba shiruru (horse)
 * Sepaitem kor nung mener aru.



NAI-A YA METETTER MA?

- HOLLYWOOD NUNG TAA TIMTIBA ANGUR ACTOR TEM: '2021'**
- Daniel Craig - \$100 million+ ("Knives Out 2" and "Knives Out 3")
 - Dwayne "The Rock" Johnson - \$50 million ("Red One")
 - Will Smith - \$40 million ("King Richard")
 - Denzel Washington - \$40 million ("The Little Things")
 - Leonardo DiCaprio - \$30 million ("Don't Look Up")
 - Mark Wahlberg - \$30 million ("Spencer Confidential")
 - Jennifer Lawrence - \$25 million ("Don't Look Up")
 - Julia Roberts - \$25 million ("Leave the World Behind")
 - Sandra Bullock - \$20 million ("The Lost City of D")
 - Ryan Gosling - \$20 million ("The Gray Man")
 - Chris Hemsworth - \$20 million ("Thor: Love and Thunder")
 - Brad Pitt - \$20 million ("Bullet Train")
 - Michael B. Jordan - \$15 million ("Without Remorse")
 - Tom Cruise - \$13 million ("Top Gun: Maverick")
 - Keanu Reeves - \$12 million to \$14 million ("The Matrix 4")
 - Chris Pine - \$11.5 million ("Dungeons and Dragons")
 - Robert Pattinson - \$3 million ("The Batman")
- 

SUDOKU # 5954 TELANGZÜBA # 5953

			2			6	3	1	2	3	6	9	7	8	4	5
9	6	3				7	5	4	8	9	5	1	2	3	6	7
			9			8		6	7	5	3	8	4	1	2	9
		8	3					8	3	7	9	4	6	5	1	2
7			1			8		5	1	2	7	3	8	4	9	6
			9	4				9	4	6	1	2	5	7	3	8
	4			8				3	5	1	2	7	9	6	8	4
8	9				6	5	7	7	9	4	8	6	1	2	5	3
3	5			9				2	6	8	4	5	3	9	7	1

OJANG LUTEP # 5499

ATTEMOSÜ	:	<input type="checkbox"/>						
AAM	:	<input type="checkbox"/>						
TÜKEN	:	<input type="checkbox"/>						
ÜNSAG	:	<input type="checkbox"/>						
AHMSI	:	<input type="checkbox"/>						
SKAA	:	<input type="checkbox"/>						
GRAEMATJAN	:	<input type="checkbox"/>						
EMTTA	:	<input type="checkbox"/>						
ASIHT	:	<input type="checkbox"/>						
GITMETA	:	<input type="checkbox"/>						

OJANG LUTEP TELANGZÜBA # 5498

**TEINYAKTSÜ TULU SÜKA TIMTEM ASER ANIBELEM
 AREMA INYAKRA TAKOK ANGUR**

TAN HOPTA ATEMA - KOMA SÜLA ?

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?



August 21, 2021 nü New Delhi nung tzüglu kanga aruba sülen Ring road nung tzü metsünga alidak gari anendena aliba noksa nung angur.

Opposition party 19-i Sept. 20 nungi tenzüka longkak aitsü

New Delhi, August 21 (Agencies): Congress densema opposition party 19-i Hokolbarnü online ajanga senden ka amenba sülen parnoki Centre sorkar nem takhangba onük 11 agüja September 20 nungi tenzüka September 30 tashi longkak aitsü telemetba agiogo.

Opposition party temi Supreme Court-i ketdangsia judicial ajanga Pegasus Spyware amshiba ken o bushisingdangtsü, aluyimba dak sendakba ozüing tasen asem agientsü aser petrol aser diesel jenjang maneni atuba anentsüla, ta takhangba agütsü.

Congress Tir, Sonia Gandhi leniba nung opposition party 19 ji- TMC, NCP, DMK, Shiv Sena, JMM, CPI, CPM, NC, RJD, AIUDF, VCK, Loktantrik Janta Dal, JDS, RLD, RSP, Kerala Congress Mani, PDP aser IUML party tem lir.

Item party nungi lenirtem senden ka amenba sülen parnoki külem sangdong ka ajanga, "Central sorkar aser ruling party-i tawa tzüngluruwa

mongpu senden nung timtem agütsüba, Pegasus ken o nung o lemteptsü mesüra telangzüba agütsütsü memelungbaji onoki sashia aitsür. Aluyimba ozüing tasen asem agientsü memelungba, coronavirus wara junga maziüoktetba, osetsüset nung jenjang kanga atuba aser mapa manguba tebilemstü onüktem nung o lemteptsü memelungbaji onoki aitsür. Item onük den tanga onük aika ajanga linük mejungi kongshir aser sorkari nbürtem sendoker," ta metetdaksü.

Opposition party temisa, Parliament nung Marshalls-i tetsür MP tem densema MP tem dak teka sangshio go aser ibaji opposition-i longkak aitba songtemtsü atema liasü, ta metetdaksü.

Ato kilonser, Narendra Modi-i Independence Day anogomong nung onük jembidang nürtem timtemba dak sendakba onük ka danga mesüok, ta opposition party temi aitsü.

Sorkari coronavirus wara junga maziüoktetba ajanga

nütsüing aika kanga timtemogo, shiranger aser asürtem osang junga mebenden, aser ibaji International aser National agencies aikati sangdongogo, ta parnoki metetdaksü.

Pegasus spyware ken o dak sendakba nung opposition party temi, "Sorkari tasüngdangba ka indangindanga langzütsü memelunger -sorkari mesüra parnok agencies kari danga Israel nung NSO dang Pegasus Spyware alizüker asü masü? Sorkari iba telangzübaji agütsütsüla," ta metetdaksü.

Parnokisa sorkar dang tang Jammu & Kashmir nung yimtenren dak sendakba nung tepuokdak alir ajak choiktsü aser J&K nem state jenjang agütsütsüla, ta takhangba agütsü.

"Tsünglanglen sign süa aliba party temi longjemer September 20 nungi 30 tashi linük tesem ajaklen longkak aitsü. Nürtemi koma longkak aitsüar ibaji onok party indang state units-i coronavirus anema tetuyuba nung ajemdaker peipei sasep nung telemetba agitsü," ta opposition party temi metetdaksü.

India nung ano nisung 34,457 dak Covid putet aser 375 asü

New Delhi, August 21 (Agencies): India nung ano nisung 34,457 dak coronavirus putet aser iba tashidak agi shiranger 375 süogo, ta Honibarnü health ministry-i metetdaksü.

Tang tashi nung linük nung nisung 3,23,93,286 dak coronavirus putetogo aser iba

tashidak agi shiranger ajak senteper 4,33,964 süogo.

Tang India nung coronavirus agi teshirangdakpur 3,61,340 dang kümogo aser ibaji 2020 küm March ita nungi tenzüka tang shirangertem tajemtiba lir.

Tesüiba ghonda 24 tsüingda coronavirus agi shiranger

36,347 anepogo aser tang tashi nung iba tashidak agi shiranger ajak senteper 3,15,97,982 anepogo.

Tang tashi nung samples crore 50.45 tendangogo aser coronavirus vaccine dose crore 57.61 agütsüogo, ta Union Health Ministry-isa metetdaksü.



August 21, 2021 nü Bihar yimtiba, Patna nung aliba SKM hall nung coronavirus vaccine agitsü atema nisungtem tarensena nokdaka aliba noksa nung angur.

Afghanistan nungi India nung ajak anir arutsüla: Congress

New Delhi, August 21 (Agencies): Afghanistan nung media osang ka ajanga, Taliban teloki India nung densema nisung 150 puogo, ta osang sangdongba sülen Honibarnü Congress party-i, tensa kanga mejungi kümogo anungji Narendra Modi-i aniba sorkari tekara nung India nung ajak anir arutsü atema inyaksüla, ta metetdaksü.

Congress party otongdar, Randeep Singh Surjewala-i twitter ajanga, "Iba osang ya taoksatsüka lir. Iba kuli nung ajemdaker Congress-i Modi sorkar dang India nung ajak anir arutsü mepishia liasü. Modi sorkari iba ya süoki ia agia

tekaraba nung India senso ajak anir arutsü atema inyaksüla," ta metetdaksü.

Honibarnü Afghanistan nung media osang ka ajanga, Taliban teloki Kabul airport nungi India nung timba ser nisung 150 dak tema puogo, ta metetdaksüba sülen Congress leniri Modi sorkar dang India nung anir arutsü nenshia metetdaksür.

Honibarnep Indian Air Force (IAF) C-130J tayimtsü ajanga Afghanistan nungi India nung 85 India-i anir aruogo.

Taoba Amongnü Taliban teloki Afghanistan linük tesem ajak agiogo aser tang parnoki iba linük nung sorkar amenoktsü atema inyakdar.

Goa nung Russia tsür ana tasü mang angu

Panaji, August 21 (Agencies): Hokolbarnü Goa kübok Siolim nung tesem balala ana nung Russia tsür tasü mang ana anguba sülen Anjuna police-i, tetsür ana asüba nungji melung malemstüsa kecha mali, ta metetdaksü.

Goa police-i Russian embassy nem iba osangji metetdaksüogo aser tasü mang anapronglaji Goa Medical College, Bambolim nung yua lir; tetsür ka soseta asü aser kaji yipten nung sür lia angu, ta Goa Police-isa metetdaksü.

Arrshi küm 24 Alexandra Ri Djavi ji la tedong, Gublawaddo-Oxel den para ki ka nung telidak liasü aser la tekolok tera meshidaki mozü techidak liasü. La tedong kidang maliba mapang nung lai pangka nungi lisü alener tekong nung lisü agi alenseta asü.

"Ano arrshi küm 34, Ekaterina Titova-a Oxel nung la aliba para kidang yipten nung sür lia angu aser la temang nung tarak kecha maliasü. La Russia nungersa ka den telidak liasü," ta police-i metetdaksü.



August 21, 2021 nü Kerala kübok Kochi yimti nung Onam benjung amongdang tangokba noksa nung angur.

Parliamentary Committee kati J&K nung International arrtsü semdang

Srinagar, August 21 (Agencies): Honibarnü Parliamentary Standing Committee on Home Affairs-i Jammu & Kashmir nung International Border (IB) semdangogo.

Parliamentary committee jagi tang anogo pezünü Union Territory semdanga Jammu nung Border Security Force (BSF) ketdangsertem den senden amener.

Parnoki International arrtsülen Jammu & Makwal border outpost (BoP) nung BSF headquarters semdanga iba tesem nungji terenlok mapatem asadang.

Congress MP, Anand Sharma leniba nung züngsem 18

UT tonga aoba mapang nung Jammu Airpirt nung SDG BSF, Surender Panwar aser IG BSF, NS Jamwal nati parnok agizüka liasü. Iba sülen committee züngsemtemi BSF BoP semdang.

Jamwal-isa committee züngsemtem dang arrtsülen nürtem aser BSF sepaitemi timtem aser tayongzüka balala ajangshiba lemsatsep.

Jamwal-isa Pakistan nungi nisung mamenba tayimtsü yokba nokdangtsü, arrtsülen nungi nisung aruba nokdangtsü, raraba hadir aser temesepba mozü shibelenba nokdangtsü atema sepaitemi maparen balala inyaka aruba osang metetdaksü.

Australia nung longkak aiter noklang aika apu

Melbourne, Luroi/August 21 (Agencies): Australia police-i Honibarnü Melbourne aser Sydney nung Covid-19 lockdown anema longkak aiterem noklang aika puogo aser kasa mapang nung longkak aiterem aser police tsungda mangatetep adokba sülen office tenet yiruogo. Linük nung anogo ka nung nisung timba dak COVID-19 tashidak potetba anogo iba ya ataloka liasü.

Police temi Melbourne nung nisung 4000 dak tema adenshia alirtem senshidaktsüsü atema pepper spray amshi aser Sydney nung longkak aiter telok tilala ishika telok tulu kuma mao tsungda riot police temi nokdanga liasü.

Victoria state police-i ashiba agi, parnoki state yimtiba Melbourne nung nisung 218 puogo. Parnoki senchi tapu balala 236 sangdongogo aser police dak teka sangshiba atema nisung asem pua lir. Police temi pua alirtem dang public health orders anema inyakba atema senchi A\$5,452 (\$3,900) achitsü.

New South Wales nung police temi ashiba agi, aibelentem rongnung public health orders anema inyakba mesera police temi aputsü merangba mapang tekong meranga nokdakba densema aibelen balala atema senchi tapu balala 260 sangdongogo. Senchitem ya A\$50 (\$35) nungi tenzüka \$3,000 tashi asütsü. Police temisa longkak aiter 250 shi yimti tonga ait, ta ashi.

Australia nung yimti tuluba Sydney, kong nütsünyongsiük million 5 dak tema lir, iba yimti nung tenokdangba tesashi agüja lir aser September tatem tashi mokdanga ayutsü tetuyuba agütsüogo. Covid tashidak menatepa aoba menokdangteti kidanger linük New Zealand tashi prokshia aoba sülen tang iba jenjang agiogo.

Honibarnü nisung 894 dak tashidak potetba rongnung timba Sydney nungi lir, kong Delta variant agi animesor tashidak menatepyonga odar.

"New South Wales nung tensa kanga mejungi lir," ta state Health Minister Brad Hazzard-i ashi. "meromerotsü atema mapang masü aser lokti aser ner kibong atema bilemstü mapang ka lir," ta pai ashi.

Police temi Sydney nung yimti yimtongetem meita ata aser ozüing alema longkak aita nung shilem agitsü aliba nungi nüburttem nokdangtsü atema parnoki yimti teyongleni oya aliba private aser public transport tem nokdanga ayu.

Kasa mapang nung Melbourne nung nisung telok ka adenshia longkak ait aser parnok rongnung kar police den mangatetep adok. State Premier Daniel Andrews-i yimti nung tenokdangba agütsür aliba state ajunga nung benokba sülen nüburttemi longkak aita liasü.

Victoria Police Chief Commissioner Shane Patton-i taoba mapang nüburttem dang longkak aiba sentong balala

nungi pila alitsü tekümdangtsü metetdaktüsügo aser ashiba agi, nüburttemi iba amala meromero maparen ka inyaktsü ta bilemstüa tagidak maka ama bilemer.

Brisbane nunga nisung noklang aikati yimjung nung longkak aitogo, ajisüaka iba yimti nung tenokdangba agüja mali.

Market research firm Utting Research-i July ita bushitsüngdang ka ajanga Australia nung shilem 7-i dang mepetmesü tulu adoka longkak aiba pusemer ta ngutetogo.

Health dak sendakba nung nüburttem nem tetuyuba balala agütsür aliba sülen tashi angaa anidakba ajanga tang takar linüktem dang nungi Australia nung wara tajungba aziüktetogo. Ajisüaka linük nung wara wave tasembuba maziükteti arudar, koba June ita tom nung Sydney nung pokteta liasü.

Australia nung tang tashi nung nisung 43,000 dak Covid-19 tashidak potetogo aser nisung 978 süogo. Ajisüaka Australia nung arishi küm16 temapurtem asemsü nung ka dang vaccine ajunga agir lir, ta federal health ministry-i Honibarnü metetdaktüsügo.

New South Wales ketdangtsürtemi Honibarnü nisung asem asüba aser nisung 516 mozükidang temang anepalua aliba metetdaktüsügo. Item nisungtem rongnung nisung 85 intensive care nung lir aser nisung 76 vaccine magi, ta ketdangsertemi ashi.

Onok linük ajak den sendaktepa lenir: Taliban lenir Ghani Baradar



Kabul, Luroi/August 21 (Agencies): Talibn-i Honibarnü, US densema alima nung linük ajunga den rongsenketzüng aser shishilembaba tsütsü tesendaktep yuner ta sangdongogo.

"Islamic Emirate of Afghanistan-i, diplomatic aser shishilembaba tsütsü linük ajunga den tesendaktep yuner aser talisa United States of America den tesendaktep

yuner," ta Taliban co-founder aser deputy lenir Mullah Abdul Ghani Baradar-i tanü tweet asüba Xinhua News Agency sangdong ka ajanga metetdaktüsü.

Media osang balala ajanga Taliban-i United States den diplomatic aser shishilembaba tsütsü tesendaktep ayutsü sentong mali ta ashiba jangjashia pai, "Linük kar den tesendaktep mayutsü atema onok kodanga sensak masem.

Iba ya olulu osang ka dang lir aser ochi masü," ta ashi.

Taliban lenir Baradar ya tang Kabul nung sorkar ka amenoktsü atema Afghan nung yimden yimsüsürtem den sensaksemba mapang ka lir, ta lenir tejen kati ashi.

Hezb-i-Islami Afghanistan (HIA) lenir Gulbadin Hekmatyar-i, Taliban lenirtem Kabul tonga aruba sülen par telok aser Afghan lenirtem tsungda sensaksem tenzüksü ta ashiba Pajhwok Afghan News sangdong ka ajanga metetdaktüsü.

Küm 20 sülen Afghanistan tanaben yimsüsü asütsü tenzüka mapang al-Qaeda amala kiralongrar teloktem den tesendaktep kecha mayutsü ta alima nem amangdaktüsü atema Taliban-i kanga merangdanga arudar.

Taliban pur mapang talangka kiralongrar den sendaktepa aruba aser parnok kibongtem kiralongrar telok balala den sendaktepa aliba ajanga Doha nung tenangzüktepba yangluba mapang parnoki Afghanistan nung kiralongrartem nem tejenokdak magütsüsü ta nangzükba mamangi arudar.

SANGDONGER



Youth Oasis Centre (YOC) koba nung lokdi tentet aser Arogotem sentong balala agia nubortem taginuba aser nungdak ataloka amshia arudagi. Tanu alima tensa rebrandanga iba kasa tesem nung November, 2021 nungi tenzüka 'Kristian Kiyimba' sentong dena agitsu melar ta ajangayang luden ajanga metetdaktür. Item sentongtem agidang sorkari teyuba inyakyim ajak amshia akatsu. Iba tesem bushia arudang Aoyimti mesura Padumpukhuri ajanga arutsu lenmang sadema lir. Anungji shirnoki iba tesem nung kiyimba sentong aginer tekupoklen aguja aliba Mobile number nung tongtepratepsu mepishia metetdaktür.

Amenoka Aliba Tesem

**Youth Oasis Centre, Old Airport Road, Eralibill
Opposite Sumi Baptist Church Eralibill**

Tontepretep: 9862918359 / 7005773879

Email: youthoasiscentre2009@gmail.com

Email: hastingscdc@gmail.com

Office of the KOHIMA LONGSA SENSOTSÜR TELONGJEM Kohima - 797001 : Nagaland

TENÜNGSANG AGÜTSÜR

Asür Wb. I. Ngangshi Jamir (Longsa) aser Wt. Atula tena jala **Wt. Onentila Jamir-i** Ph.D in Sociology on the topic "A Sociological Analysis of Shopping Culture Among The Youth of Nagaland", nung Degree tajung nguteta lokti nem tenüngsang tajung bener arutsüba atema Kohima Longsa Sensotsür Telongjem sabang ajanga pelaba lemsateper aser tarutsü anogotem nung nü sempet tajung agi nübör tenzüksü Tsüngremi arishi talang moajangma.



**Sd/-
Wt. TIAKAlA
President, KLSTT**

**Sd/-
Wt. TULAMENLA
General Secy., KLSTT**

Pakistan nung China nung ka pokset

Shanghai, Luroi/August 21 (Agencies): Pakistan nung pei temang nung bomb alenoker pokdaktür kati Hokolbarnü China nung mena aliba motorcade ka amakba sülen China nung ka aser local tanur ana tepset, ta Chinese embassy-i Honibarnü metetdaktüsü.

"Pakistan nung Chinese Embassy-i kiralongrar maparen aitsür aser linük anaprongla nungi yirur alirtem takaratiba nung taneptsü angutsü imlaja ataba den asürtem den asükhu lemsateper," ta Embassy sangdong ajangsa metetdaktüsü.

Iba lendong ya Balochistan kübok Gwadar East Bay Expressway project nung atalok, ta embassy-i ashi. Bomb apokba lendong nung yirurtem temang anepalutsü atema Gwadar nung mozüki kati yokogo, ta kasa sangdong ajanga metetdaktüsü.

Maneni embassy-i Pakistan nung ketdangtsürtem dang iba tatalokba ken o süoki ia

bushisüngdangtsü aser aibelena alirtem merenshitsü ayongzükogo.

July ita pei temang nung bomb alenoker pokdaktürtemi tzü nokdang ka yanglua aliba nung mapa inyakertem mener aliba bus ka amak aser nisung 13 tepset, kong China nung teku densema liasü.

Pakistan foreign minister-i ashiba agi, Pakistani Taliban militants, shirnok dang Tehrik-e-Taliban Pakistan ta ajar parnoki iba lendong bener arutsü. Kasa mapang nung TTP-i iba tatalokba nung parnok densema mali ta Reuters dang ashi.

China Pakistan Economic Corridor nung shilem ka ama Beijing-i Pakistan nung USD billion 65 dak tema indang project balala benoka inyakdar.

Communist Party indang official People's Daily-i, bus amakba ya küm tsungda China nung amakba rongnung tesashiba liasü, ta ashi.

Pelaba Lemsateper



T. P. IMCHEN
6th May 1932 - 18th August 2021

"Temeshi nisung shibai tai makai jajar, pa sülen par chirji temoatsüba."
Apijemtsü Shin 20:7

Longjang yimtsüung nungi Wb. T. P. Imchen, IAS (Retd.) arishi küm 89 lia Eden Medical Centre, Dimapur nung August 18, 2021 nü akümüli wadang tembanger kodak limai ogo.

Pa ya temeim kinungbo, tebu, tebo aser khuret abenba adianu ka liasü. Pa iba akümüli wadang toktsür aodang ajaki temeim sayua aser nungitba ajanga pa jakla ajungba kuli sayur, shibai indang indanga aser ochi nung pa taküm liogo.

Ozü asükhu mapang, shirnokisa nübo, rongsen aser sarasadem ajanga nungita yariogo, nenok ajak dang ozüi pelaba lemsateper. Eden Medical Centre aser Doctor den Nurse ajak, shirnoki pa mapang talangka shiranga alidang anepaluogo, nenok danga ozüi alakteta pelaba shisemer.

Nenok kija shia tenüing teta ozüi pelar ta meshitetaka, Tulusang Tsüngremi nenok ajak molamushia moajangma ta ozüi sarasademtsür.

~ Temeim Kinungtsü, Chirnurtem, Semchirtem aser Adianutem.

Sept. 3 nü 'Shang Chi and the Legend of the Ten Rings' sayatsü

Mumbai, Luroi/August 21, 2021 (Agencies): 'Marvel Studios' indang aruya aliba superhero film - 'Shang Chi and the Legend of the Ten Rings' September 3, 2021 nü India nung sayatsü sentong lir, ta Studio ajanga metetdaksü.

MCU fans temi kanga dang yongya ataba film ya Daniel Destin Cretton-i direct süogo aser Simu Liu-i tongti shilem agiba angutsü. India kübok theatre tem nung Marvel film tasenba ya English, Hindi, Telugu aser Kannada oshi nung lemsar sayatsü.

"Marvel fans atema osang tajung ka! September 03, 2021 nü 'Shang-Chi and the Legend of the Ten Rings' cinema nung

sayatsü! English, Hindi, Telugu aser Kannada oshi nung iba film sayatsü terenemba lir," ta social media sabang nung Marvel Studios-i lemsatep.

Destin Daniel Cretton-i direct ama achayanga aser Kevin Feige den Jonathan Schwartz nati yangluba film nung, Simu Liu, Awkwafina, Meng'er Zhang, Fala Chen, Florian Munteanu, Benedict Wong, Yuen Wah, Ronny Chieng, Zach Cherry, Dallas Liu, with Michelle Yeoh aser Tony Leung nungeri tongti shilem agiba angutsü.

Iba film nung Chinese-Canadian actor Liu-i martial arts superhero ka ama shilem agiogo, koba Marvel indang

project nung Asia nung actor kati mezüing tongti shilem agiba film asütsü. "Shang Chi and the Legend of the Ten Rings" ya "Avengers: Endgame" (2019) sülen atalokba otsü ama yangluogo.

Hong Kong star Tony Leung-i Shang-Chi tebu - Wenwu aser nisung tamajung ka ama shilem agiogo.

Cretton, shibai movie talisa "Just Mercy" aser "Short Term 12" direct asüba ajaki jangjaa lir, iba film atema pai Dave Callahan aser Andrew Lanham na den longjemer screenplay zülua liasü.

Disney meyong Marvel Studios ajanga "Shang Chi and the Legend of the Ten Rings" produce süogo.

Actress Chithra alima nungi pilaogo



New Delhi, Luroi / August 21, 2021 (Agencies): T a o b a m a p a n g a c t r e s s

Chithra, shibai Malayalam cinema tsütsü inyaka liasü, Honibarnü iba akümüli nungi pilaogo. La arishi küm 56 liasü.

Sangdong ajanga angazükba agi, Saligramam, Chennai nung Chithra temolungjang agi mapa meinyaki akümba sülen, la süadok. Honibar nikongdang 4:00 ako meta la den asüpila sentong agiogo.

Chithra asüba osang angashia, actor Prithviraj Sukumaran-i Instagram ajanga mangyim jashi lemsatepa liasü. La (Chithra indang noksa ka den, "Tesünep nung Anisüngzükangma", ta pai lemsatep.

Wadang tsütsü takok ngua inyaka aoba den Chithra nem "Nallennai" nungja agütsü; aser acting tsütsü lai Tamil aser Malayalam film 100 dak tema nung shilem agiogo.

1982 küm 'Razia' ta nungja agütsüba Hindi film nung Chithra-i shilem agiogo aser iba sülen, 1984 küm 'Ek Nai Paheli' nung la shilem agia liasü.

Acting maparen nung ajemoka, Chithra-i K. Balachander indang Tamil film "Apoorva Raagangal" nung mezüing shilem agia liasü. 1983 küm Malayalam film "Aattakalagam" nung Mohanlal den külemi lai shilem agiogo.

Item film dak alia, Chithra indang nungtugu film rongnung Adavitam, Ekalavyan, Devasuram, Nadodi, Commissioner, Aaram Thampuran aser Ustad densema Malayalam drama balala dena lir.

Chithra-i la kinungbo Vijayaraghavan aser jala Mahalakshmi toktsür süogo.

KOMA SÜLA TELANGZÜBA

Q. Clean election takok angutsü atema voter shia dangi "ni" vote mayoktsü" ta sign südaktsüyonga Signature campaign sentong ka agia ao nunga koma süla ?

Küm ishika tejaklen ABAM ajanga Clean Election den sendakba nung Aoli yimtsüung aser Town tem nungi Yimsüsür aser Arogo tenzükertem sentepa Impur nung sendong tajung ka ayongzük. Idangji onoki meteta aliba nisung kati "Nibo ajaki ngua dang sign asütsü" ta shia pledge card ka nung sign asü. Election tonga arudangbo iba nisung toagi candidate asem dang nungi sen meshia agiba angashi. Komaar ka meranga inyaktepyonga pei tangatetba liaka temolungtetba melira sen tsüngdangji alangtsüsa.

-WhatsApp

Clean election takok angutsu atema ta sur naga nung voter shia dangi vote mayoktsu ku voteji ku meyong ta ochishia agutsutsu ta nangzuka sign suang ta asunung asenok ajaki junger ta sua sign asutsu. Saka tanu asen naga nung Nagaland for christ ta jembir. Saka nangzuka, jembiba ama meinyakteter aser meliteter election ta sura rongsen dak rangloker aser bilemteper. Anungji Tsungrem tsungdang tezungzuketpa ayu signbo asu saka election arudangbo tenangzuka ajaktu amar rongsen dak dang ranglokerji asen naga nungbo Tsungremer atakatem-ang mechimalir odang pei mulung dang sudaktsüba tajungba asutsu ta nibo bilemer

-SMS

Angami, chakesang, item kin yagi foot hill leman aser Assam den border nung timtem adokba hau mali. Iba leman aser arrtsu ajanga parnok nem tajangzuk kecha magutsur aser timtem majurur. Assam Nagaland arrtsu nung aiben mangatetep, rongrong mepetmesu adok dang par litsu nung mamshiba agi kecha Suoki ia mepilemer saka Burma side, Assam side, Arunachal side, Manipur side ajak ya Nagaland aser Naga nung lima lir. par Lima nung par-i CM abenba agi pai shinga metsubur aser pa sunutsu asur, mapang ka nung S, C, Jamir, hokise sema nungeri CM abendang Angami nungeri o tamajong paper nung zulus wall, ki ajak nung nuploka senzu, kma develop asuba ya par Lima asuba agi Rio-i asur masu saka Naga nung ajak sen agi inyaker, kma ya par Lima nung lir saka par Lima ama mepilemtsula kechiaser govt-i ali ajak aliadokogo. ABAM-ibo lakh 45 tema iba foot hill atema tenlaogo saka govt-i hau mali. kum 2 tashi lockdown aru dang kin palala nungi tulur takar aikati teyari agutsüba abgashiogo saka Riobai pa nija sen agi yariba mangashi, Ao, Sumi, Lotha, Konyak, Sangtam, Chang, Phom, Yimkhiung, Khimnungan item kin ya nagaland nung tongtipang aser 70% majority lir saka iba foothill leman atema tasu ita mejembiteter. ya kecha tai masu saka tenyimi policy majong. saksalema alitsu merangdi aser Tsungrem dang molongsentsu ajak agi sarasademtsüla. God bless foothill road.

M. A, Ao 4th mile, H/No 16 near four lane NH 29.

Kisa mapaji taoba election nunga abam ajanga clean election sentong tajung yanglua arogo ajak tangi form aser flack yoka temulongeri bener aotsu metetdaksu onok aliba arogo nunga kibong meyi tema lir saka iba form flackji kibong tenem shikai bener aoba otsu lir arogo nung teka amoka inyakertemia form flack meshia bener oa kidang youer candete Tang sen meshia bener kiyong nung lema senzuba tenuk koli lir Anungji asenoki komar ka jembiyonga takok mangutsu Anungji Tang aruya aliba electionjia tamajungba anga asutsu akok.

NS Jr

Ni vote mayoktsu ta signature compaign aoyonga majungtsu. Kum pongu auyatena ayuba election mapang alemerdangji kecha tai mali ta nupurtemi angateta lir. Anungji kecha mapa tepolu.

- SMS.

Taruba Election atema asenok nem sen jendi ahadana rezüngtsüdar nung aji lemja arudang mha ta ashitsüsa masü dang bener arutsutsu. Saka item ajakji koktettsü atema kü senti vote yabo Election makidang yongi sen aser rongsen yong yoka machitsü ta tangatetba takang shiba dak aka Pa/La-i dang signa mesütep yonga koktettsü.

-I K Dmr.

Tang ama mapang ano election agitsü küm ka shi lia mesüra ita ishika lia ni kü vote mayoktsü ta sign südakja arunungbo nisung aikati sign asütsü südi ta bilemer. Saka kodang election tonga arudir sen tsüngdang shinga mejenbuttsü. Ni kü vote mayoktsü ta sign asür ajak to agi candidate ajak dang sen aikasa meshia achitsü. Shibai metet arogo nung tenzükertem tajungtema aibelentsü ta bilemer.

-T. Ao SMS, MKG

IPL 2021: Punjab Kings nung Nathan Ellis denogo

New Delhi, Luroi/August 21, 2021 (Agencies): Indian Premier League (IPL) 2021 indang tanabuba shilem atema Punjab Kings nung Australia nung fast bowler Nathan Ellis asayatsü, ta team sangdong ajanga osang jangjatsüogo.

Nathan Ellis maniokdang, Punjab Kings-i bendanglen nungi asayar fast bowler ana - Jhye Richardson aser Riley Meredith naprongla Indian Premier League 2021 indang UAE leg nungi agienogo.

Ellis, shibai tan ita Australia aser Bangladesh na asayaba mapang, Australia nung tebur cricket asayar rongnung T20 hat-trick agir mezüng aküm, T20 World Cup atema Brehostibarnü Australia indang 'reserve player' asem rongnung pa shima liasü. October 2021 nungi iba T20 World Cup asayamung tenzüksü terenemba lir.

Taküm küm tetenzüklen IPL auction agiba mapang, sen lakh 20 (base price) agi auction asütsü atema Ellis tenüng agütsü, saka franchise kati dang mali aser tang Punjab Kings puri pa alir asütsü.

IPL 2021, koba bio-bubble telungtet nung franchise nungi asayar aser staff kar dak Covid-19 putetba ajanga May ita iba asayamung thinena liasü, September 19, 2021 nungi iba asayamung Dubai nung tenzüksü, kong League tenzüka Chennai Super Kings aser Mumbai Indians na tsüngda asayatsü.

Iba sülen, IPL asayamung Abu Dhabi belener aotsü, kong Kolkata Knight Riders aser Royal Challengers Bangalore na asayatsü. September 24,

2021 nü Sharjah nung Royal Challengers Bangalore aser Chennai Super Kings na asayatsü.

UAE kübok tesem asem lemsar IPL asayamung ayongzüksü, kong Dubai nung asayae 13, Sharjah nung asaya 10 aser Abu Dhabi nung match 8 asayatsü.

Iba asayamung dak sendakba nung tekümdangtsü meratem agitsü asoshi, BCCI-i 'health advisory' kaket ka adokogo. Iba league süsümedema aser takok ngua asayatsü asoshi IPL den sendaktepa alir ajaki item tetuyuba nung anidaktsü nüngdaker.

** RCB-i asayar tasen asem aniokogo **

Honibarnü, Royal Challengers Bangalore-i Indian Premier League 2021 indang tanünga asayatem atema team nung tanga asayar melena, asayar tasen asem aniokba sangdongogo.

Taoba IPL asayamung final nung shilem agir telok - RCB-i Sri Lanka team nungi spinner Wanidu Hasaranga, fast bowler Dushmantha Chameera aser Singapore nungi all-rounder Tim David nung anisemogo.

Ahmedabad aser Delhi kübok franchise indang bio-bubble nung züngsem kar dak Covid-19 putetba sülen, May tetenzüklen IPL 2021 thinena liasü. T20 World Cup asayamung metenzükdang, IPL indang tanünga shilem ajak UAE nung ayongzüksü renemogo. Team 8 dena aliba point table nung, RCB pur asaya 10 nungi asaya 7 koker sülen, parnokki tasembuba

jenjang tongteta lir.

Taoba ita Shikhar Dhawan-i aniba India team aser Sri Lanka asaya liasü aser Sri Lanka-i 2-1 agi India madak series akokba mapang leg-spinner takotet, Wanidu Hasaranga-i 'Man of the Series' naroküm angu. Tang, IPL tanünga season atema Adam Zampa melen Wanidu asayatsü.

Taküm April aser May ita India nung Australia team nungi leg-spinner Adam-i RCB nung asaya liasü.

Kasa team (RCB) nungi Australia nung fast bowler Kane Richardson aser Daniel Sams naprongla tanünga IPL 2021 nung shilem magitetsü. Fast bowler ana melena RCB-i Dushmantha Chameera dang shim.

Singapore team nungi all-rounder Tim David, shibai league balala nung junga asaya lir, pai RCB tenüng nungi Indian Premier League nung mezüng asayatsü maongka nguogo.

New Zealand nung Scott Kuggeleijn aser wicketkeeper-batsman Fin Allen naprongla külem Blackcaps pur den international tour nung asayatsü lemtetogo. Ibayongji IPL nung RCB atema tenati shilem magitsü.

Maneni, timtem kar ajanga Simon Katich-i head coach (RCB) mapa toktsüba osang RCB-i sangdongogo. Taoba mapang Australia opener Simon-i IPL 2021 indang UAE leg nung shilem magitsü. Simon melen, tanünga IPL asayatem atema, Director of Cricket Mike Henson-i head coach ama repsema inyaktüsü.

Asian Games nung medal angutsü bilemdar: Mirabai Chanu

New Delhi, Luroi/August 21, 2021 (Agencies): Tawa tembangba Tokyo Olympics nung silver medal angur Saikhom Mirabai-i, 2022 Asian Games nung medal ka angutsü bilemdar aser küm asem sülen Paris Olympics nung gold medal angutsü nükjidong lir, ta ashi.

Olympic asayamung nung küm 20 dak tema India weightlifting tetoktepba tsütsü medal ka danga menguteti arur sülen, taküm Tokyo Games 49kg category nung Chanu-i silver medal angu.

Chanu-i ashiba agi, aruya aliba Asian Games nunga gold medal angutsü nükla yur shilem agitsü bilemdar.

"Asian Games nung medal ka angutsü bilemdar, kong weightlifting saisapong tsütsü India-i medal ka danga ngua mali. 2022 Asian Games nung

India tenüng nungi medal ka angutsü asoshi ni tajungtiba asayatsü," ta Mongolbarnü virtual ajanga osangbener den jembiba mapang Chanu-i ashi.

Kasa mapang Chanu-i Amway Nutrilite indang brand ambassador inyaktüsü ta osang sangoktsüogo.

"Iba sülen (Asian Games) 2024 Paris Olympics nung ni gold medal angutsü asoshi merangtsü," ta lai shisem.

2014 aser 2018 Commonwealth Games asayamung anaprongla nung Chanu-i silver medal aser gold medal takok ngua lir. Asayamung ana tsüngda, 2017 küm lai World Championships title takok angu.

2020 Asian Championship nunga Chanu-i bronze medal ka ngua lir, saka Asian Games nung lai medal ka danga

mengudang.

Manipur tsür arishi küm 27 tain Chanu temang nung timtem aliba ajanga, 2018 Asian Games nung lai shilem magitet. Iba timtem ajanga kasa küm lai World Championships nungi tukadok.

Olympic asayamung nung medal angutsüsa nungitba yariba atema, Chanu-i coach Vijay Sharma dang pelaba lemsatet.

"Training nung aibelen dang mesüra temang nung timtem adokdang, pai (Vijay) kanga nungita yariogo. Maparen ajak nung pai teti ajungmesoa aser shisatsü agüja nungitogo," ta Chanu-i ashi.

"Pei jala ka ama pai kü dak temeim sayua anepaluogo. Tarutsü nunga tetsür asayartemi pa ama coach ka nungi angazüktsüla," ta Chanu-i ashi.

SLC-i 'National Player Contract' sangdongogo

Colombo, Luroi/August 21, 2021 (Agencies): Sri Lanka Cricket (SLC) indang national contracts nung asayar 18 rongnung all-rounder Angelo Mathews den asaya nungi anentsür alir asayar asem - Danushka Gunathilaka, Niroshan Dickwella aser Kusal Mendis nung maden.

Ita pungo atema iba contract renem, koba December 31, 2021 tashi asütsü.

Iba contract dak sendakba nung, Sri Lanka Cricket Board-i, "Taoba mapang agütsüba contract nungi temelenshiba kecha meyaglui asayartemi iba contract nung sign süogo. Iba contract ya Sri Lanka Cricket den külemi Technical Advisory Committee ajanga yanglua liasü," ta metetdaksü.

"Asayar ajak (National contract nung adenertem) telesa pezü kübok shima liasü aser parnok indang "Performance, Fitness, Leadership/Seniority, Professionalism/Code of Conduct aser Future/Adaptability" tem asadanga Selection Panel ajanga parnok shimtet. Iba contract nung sign mastügang, asayar shia nem lezmüksüba criteria' aser point' ajak parnok (asayar) den lemsatet," ta kasa sangdong nung shia lir.

Asayar takoktet Angelo Mathews, pa selection nung

mezüngok asünung, 'contract player' list nung pa meshim, ta SLC-i osang jangjatsüogo.

"Angelo Mathews, shiba contract lezmüksü asayar rongnung densem, tang selection inyakyim nung pa tenüng madenba ajanga, iba contract list nung pa maniok. Danushka Gunathilaka, Niroshan Dickwella aser Kusal Mendis nung cricket asaya nungi nokdang lir asünung, parnoka contract list nung maden. Külem asayar Isuru Udana international cricket nungi anenogo," ta SLC-i shisem.

England aser Sri Lanka asayaba mapang, Durham nung bio-bubble protocol anema inyakba atema, England nungi Mendis, wicketkeeper Dickwella aser Gunathilaka nung pei talidaki yokadok.

National contract angur asayartem rongnung Dhananjaya De Silva, Kusal Perera, Dimuth Karunaratne, Suranga Lakmal, Dasun Shanaka, Wanindu Hasaranga, Lasith Embuldeniya, Pathum Nissanka, Lahiru Thirimanne, Dushmantha Chameera, Dinesh Chandimal, Lakshan Sandakan, Vishwa Fernando, Oshada Fernando, Ramesh Mendis, Lahiru Kumara, Ashen Bandara aser Akila Dananjaya nung dena lir.

World U-20 Athletics: Amit Khatri-i silver medal angu

Nairobi, Luroi/August 21, 2021 (Agencies): Honibarnü, World U-20 Athletics Championship - tebur '10km race walk' tetoktepba nung India nung Amit Khatri-i silver medal nguogo. Tesüiba anogo ishika tejakdang külem team puri '4x400m mixed relay team' nung bronze medal anguba sülen, Amit-i silver medal angur asütsü.

10km race walk' nung Kenya nung Heristone Wanyoni minute 42:10.84 nung alizüng tongteta gold medal angu. Khatri-i minute 42:17.94 nung alizüng tongteta tanabuba jenjang ajangzüktet. Iba asaya nung Khatri tejakdang ser asema liasü, saka iba race atemtsü lap ana dang anünga lia, Wanyoni-i Khatri ajatetadok.

Kasa tetoktepba nung Spain nung Paul McGrath-i bronze medal angu. Pai minute 42:26.11 nung alizüng tongteta liasü.

Gold aser bronze medal takok angur anapronglai (Heristone aser Khatri) iba asayamung nung record yangluogo.

9000m tashi asemer sülen, Khatri tejakdang ser asaya liasü, saka race atemtsü lap ana dang anünga lia, Wanyoni-i gold medal angutsü atema pai Khatri ajateta asem.

Rohtak (Haryana) nung alir Khatri-i ashiba agi, tan asayamung nung bilemba ama masayatet.

Taküm January ita Federation Cup Junior National Championships - 10km race walk nung Khatri-i minute 40:40.97 nung alizüng tongteta gold medal angu.

"Bilemba ama junga masemtet, saka silver medal anguba atema pelar. Asayamung tenzüksü anogo pungo lia tesem tonga aruyongjia, iba tesem atang/tenem den tzü mopung balala asüba ajanga tango sashitsü timtema liasü," ta asaya temer sülen Khatri-i ashi.

"Tasemdak nung tesem kar nungbo tango junga magitet, saka silver medal anguba atema pelar," ta pai shisem.

Khatri-i International asayamung nung mezüng shilem agir asütsü.

BILEMDANGANG

"Telok nung lennir tajung melira nütüng samar."